

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xikihi mé xrankíxixín tí tan jína kuènte Jesu-
cristo mé tí Xjeen Dios.

² Ósé mé kjuák'e ch'ín Isaías mé ijnko nkexro
tsíchr'án Dios chrónka itén ch'án k'uékjin ch'án
nkexrí nixjehē Dios tí Xjeen ch'án ntáchro kíxin:
Janhan tsochr'an ijnko nkexro tsochrónka tan
kuèntana tsitónxin ntja,
kíxin tsjasiyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje
ts'èya tsontáchro kíxin:

“Tóxakonhanrá ncheyóxinrá ntja tsixin Ìnchéni, tak-
itjehérá ijnko ntja ntoí.”†

⁴ Tíha mé xíteyá ikui ch'ín Juan Bautista, mé
xikaha kjuák'e ch'án nteje kuikite ch'án chojni.
Kjuakohe ch'án chojni ntiha kíxin chrókjuinkí sín tí
nkehe tjenkayáxin sín chrókuítóhe sín tí ijje sín ntá
chrókuikite sín kíxin xikaha mé chrókjuin ijje sín.

⁵ Itsjé chojni kuixin estado Judea la ko tí chjasin
Jerusalén ikui sín tí kjuák'e ch'ín Juan kuínhin sín
tí nkehe kjuako ch'án ntá chrónka sín tí jje yámá
sín ntá ch'ín Juan mé kuikitexín sín ch'án ntario
Jordán.

* 1:2 Malaquías 3.1 † 1:3 Isaías 40.3

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. ⁷ Mé kjuák'ekjakohē ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuana chrókjuasintanka tí correa tí tokaté ch'án. ⁸ Janhan mé inta ó kuikitejínra. Ntá jehe ch'án mé tsikitejínra ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)*

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikitejín ch'án tí ntarío Jordán. ¹⁰ Tió k'uaxrjenkixin ch'ín Jesús tí inta, ntá xrínahya titaya k'uíkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. ¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

*Ch'ín Tsohren chrókjuachroe tí ch'ín Jesús kixin
chrókjuasin ch'án jie
(Mt. 4.1-11; Lc. 4.1-13)*

¹² Ntá tí Nchakuen Dios mé sákjuíko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntiha mé k'uixin ko jiehe ntá ch'ín Tsohren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankíxixín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntøechiso ntá ch'ín Jesús na mé sákjuí ch'án nó estado Galilea sákjuíkjakøhe ch'án tí sín ntiha tí tan jína kuènte Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etøan ch'án. Chrókuítóhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uíyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sin tí nchísén chrínkí ntá. ¹⁷ Ntá ntáchro tí ch'ín Jesús kixin:

—Chréhérá tí janhan, ntá tsøtjahárá xra tsjéyará chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuíko sín ch'án.

¹⁹ Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehé sín la ko tí it'é sín tjejóxenhen sín tí ntabárco tjejójtjonité sín tí nchísén tséya sín tí koche. ²⁰ Na ntá ch'ín Jesús mé k'uíyehé tí jehé sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárco la ko tí sín tjinkitsa ch'án ch'e xra. A ntá jehé sín sákjuíko sín ch'ín Jesús.

*Ijnko chojni chón̄ta injnko nchakuen tí jínahya
(Lc. 4.31-37)*

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí n̄nko Israel. Na ntá ntaha mé kjuankíxin ch'án kjuako ch'án. ²² A ntá tí chojni siín ntiha mé chrakon sín kuínhin sín tí nkehe kjuako ch'án kíxin kjuakoxin ch'án kíxin chón̄ta ch'án kjuachaxin, la jehya éxí tí sín maestro tjako tí ley, ichro sín. ²³ Ntá tí n̄nko Israel chjasin ntiha itjen injnko chojni chón̄ta injnko nchakuen tí jínahya k'uíyato ntáchro kíxin:

²⁴ —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kíxin s̄nchek'itjáyanni? Janhan mé ó kjuáts̄oan tí jaha, la ko nòna kíxin jaha tí nkexro tjóá kuènte Dios —mé xikaha ichro tí nchakuen tí jínahya.

²⁵ Ntá ch'in Jesús mé k'uetuēnhen tí nchakuen tí jínahya ntáchro ch'án kíxin:

—Tániá, t'axrjéxian tí jehe ch'án —mé xikaha ichro ch'in Jesús.

²⁶ A ntá tí nchakuen tí jínahya mé kjuínchek'aniáte tí ch'in a la ko k'uíyatoxín tsen ntá k'uaxrjexín tí ch'in a. ²⁷ A ntá kaín sín chrakon sín ntá kjuanchankíhi sín kíchó sín, ntáchro sín kíxin:

—¿Xá nkexro tíha kíxin tjako ch'án nkehe n̄ixin? Jehe ch'án chón̄ta kjuachaxin kíxin t'etuēnhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uíxikónohe kaín xín sín estado Galilea kíxin nkexrí tí kjuachaxin chón̄ta tí ch'in Jesús a.

Ch'ín Jesús kjuínchekitohe jína tí ich'ee tí ch'ín Simón Pedro

(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjexín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sin ntøe ch'ín Simón la ko ch'ín Andrés. ³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

Ch'ín Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)

³² A ntá tió kjuiátaón yaon tió k'uíxin tie kuikøhe sín tí ch'ín Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkotsé sín k'uíxintankí sin ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsøan tíha nkexro tí jehe ch'án.

Ch'ín Jesús mé kjuako ch'án estado Galilea
(Lc. 4.42-44)

³⁵ Ntá naxa sítié k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní. ³⁶ Ntá ch'ín Simón la ko tí sín xriko ch'án mé sákjuíkjeyá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjexiaḥ chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chónṭa sín.

Ch'ín Jesús kjuínchekitoḥe jína ijnko ch'ín chónṭa chinlepra

(Mt. 8.1-4; Lc. 5.12-16)

⁴⁰ Ntá kui ijnko ch'ín chónṭa chinlepra kjuák'exín toch'in ch'án nkayakon ch'ín Jesús ntá chrónóeḥe ch'án ntáchro ch'án kixin:

—Tí tjínkávan jaha la jína chrókjuínchekitoḥéni jína —ichro ch'án.

⁴¹ Ntá ch'ín Jesús na imá kuikonóeḥe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjínkávan. Ntá jie sintakitōha jína —ichro ch'án.

⁴² A ntá xikaha ntáchro ch'án ntá tuénxín kjuìn tí chinlepra ntá kuítóhe ch'án jína. ⁴³ Ntá k'uetuēnhen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátjia tjákohé tí ch'ín nchāt'á kixin ó kjuínhan tí chinlepra la ko tjánjuan tí nkehe tsík'etōan ch'ín Moisés‡ kixin tsonoexín kaín xín chojni kixin ó kuítóha jína —ichro ch'án.

⁴⁵ A ntá tí ch'ín tsíkitoḥe jína, a ntá sákjuí ch'án kjuankixin ch'án chénka ch'án kaín xín chojni kixin nkexrí kuítóhe ch'án jína. Méxra xitjahya

‡ 1:44 Levítico 14.1-32

ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

Ch'ín Jesús mé kjuínchekitohe jína ijnko chojni tsík'en toté

(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uíxikónohe chojni kíxín ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uíxixenhen sín la ko kjaxín kjuachahya tí ntója nchia chrók'uíxintankí sín. ³ Ntá ch'ín Jesús kjuako tí tan jína kuènte Dios. ³ Ntá kui noó sín tinkátsénkí sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kíxín nchónhya chojni síin. La ntá k'uit'ótjen sín tí chrítaón nchia a ntá k'óxrət'ò sín. Na ntá ijnko hnò kjuak'ete sín tí kania tjenkáya tí sinníhi a ntá kjuinkajín sín ntoí tí tjen ch'ín Jesús a. ⁵ Tió k'uíkon ch'ín Jesús tí nkehe kjuích'e sín ntá ó nohe ch'án kíxín chaxín imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kíxín:

—Xjeenni, ó kjuixín kjuíinhan tí jié chonta —mé xíkaha ichro ch'án.

⁶ Na ntá iso tí sín maestro tjako tí ley tjejótjaxín sín ntiha na ntá jehó sín mé kjo sín asén sín kíxín: ⁷ “¿Nkekuènté xíkaha nixja tí ch'ín i ncheyóhe ch'án asén ch'án Dios? Kíxín ninkexró xitjahya tsjatsìn ijje kíxín jehó Dios mé chóna kjuachaxín tsjatsen ijje chojni”, mé xíkaha ikjo sín asén sín. ⁸ Ntá ch'ín

Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá?
 9 ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhin ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án? 10 Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjìnhin ijíe chojni —ichro ch'án.

Ntá ntáche ch'án tí ch'ín xitjahya tji kixin:

11 —Jaha tétuanhan t'inkatjen, tjenájían kaniaa na sátjia ntoa —ichro ch'án.

12 A ntá tí sìnñíhi na tuénxín k'uíinkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uíkonhyéni tí nkehe i —ichro sín.

Ch'ín Jesús k'uíyehé ch'ín Leví

(Mt. 9.9-13; Lc. 5.27-32)

13 A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. 14 Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènkí ch'án. Ntá ch'ín Jesús mé k'uíyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uíinkatjen ch'án chr'éhe ch'án tí ch'ín Jesús.

¹⁵ **A** ntá ch'ín Jesús kjuák'e ch'án ntøe tí ch'ín Leví, la ntá kjuanjon sín nkehe sine ch'án la ko kjaxin k'uéjò nchónhya tí sín nchekjènkì la ko kjaxin í so chojni chóna jìe. Mé kaín tí sín a mé tjejóttjaxin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín ti sín nchekjènkì la ko tí í so sín chóna jìe, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikao ch'án tí sín nchekjènkì la ko tí í so sín chóna jìe? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uínkahya ntihi kixin chrók'uíyahā chojni jína tjejó sín. Náhí. K'uinka kixin ts'íyahā chojni chóna jìe —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehe sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xíkaha ts'áyéhe sín kjuaxróxin, ichro sín. **A** ntá kui iso chojni nixjehe sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jìe, a ntá tí sín xrikoa la ine sín? —ichro sín.

¹⁹ Ntá kjuátèhe ch'ín Jesús ntáchro ch'án kixin:

—¿Xá chrókjónehya tí chojni tsík'íyehē sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsikótehe, ntá tí yaon la chaxín sinehya sín.

²¹ Ninkexró chrókjuak'eniehe ijnko ka ó ntaxin it'ō ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. ²² La ko kjaxin ninkexró chrókuikia xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

*Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín
(Mt. 12.1-8; Lc. 6.1-5)*

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte síin noatrigó. Na ntá tí sín k'uájiko ch'án kjuankíxin sín ik'uín sín iso noatrigó. ²⁴ Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuèté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

²⁵ Ntá kjuátēhe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uixenhen ch'án ntōe Dios tió kjuák'e nchāt'á Abiatar k'uetōan, a ntá kjóne ch'án tí niotja

tsíkóyaon kjónté jehó tí sín nchat'á mé k'uéchónta kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a.

²⁸ A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'ok'éheni —ichro ch'án.

3

Ijnko chojni tsíxámá tja

(Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án ijnko ninko Israel inaá. Na mé ntiha tjen ijnko ch'ín tsíxámá ijnko tja ch'án. ² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitóhe ch'án jína tí ch'ín tsíxámá tja tí yaon t'ok'éhe sín kixin mé jína tsjanchia sín jie, ichro sín. ³ Ntá ch'ín Jesús mé ntáche ch'án tí ch'ín tsíxámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitóheni chojni jína ní o á chrók'óyánni chojni? —ichro ch'án.

A ntá jehe sín la táníkoá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'ává

* 2:26 1 Samuel 21.1-6; Levítico 24.5-9

ch'án kixin tjinkakonhya sín tsikonóehē sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína. ⁶ Na ntá tí sín fariseo a k'uaxrjexín sín ninko sákjuí sín k'uíto sín tí sín kuènte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

Nchónhya chojni síin chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kuixín sín nó tóhe ntario Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jié kjuasin ch'ín Jesús ntá kuichréhe sín ch'án kixin chrók'uikon sín tíha kjaxin. ⁹ Ntá k'uetuēnhen ch'án tí sín k'uájiko ch'án a kixin ntahó chrókjuak'echonhen sín ijnko ntabárcō. A ntá tí imá chrók'uixitja sín ch'án ntá chrók'uixenhen ch'án tí ntabárcō, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitōhe ch'án jína, na ntá kaín xín tí sín níhi k'uixitja sín ch'án kixin tjinkaon sín chrókuákóxin sín ch'án. ¹¹ Kjaxin tí sín chóna nchakuen tí jínahya na mé tió k'uikon sín tí ch'ín Jesús ntá k'uéjoxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya k'ixin kohya kjuachaxin tsochrónka k'ixin nkexro tí jehe ch'án.

*Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)*

¹³ A ntá chr'éxin chr'in ch'ín Jesús ijnko jna, a ntá ntiha k'uíyehē ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án k'ixin ts'etuenhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín i mé tí teyó sín tsíkjejá ch'án mé it'in sín xikihi: Simón na mé kjuínchek'in ch'án Pedro; ¹⁷ la ko Jacobo la ko tí kícho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín k'ixin Xjeen Síjtonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko íjnko Simón tíhi mé kuènte tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

*Ntáchro sín k'ixin ch'ín Jesús chóna kjuachaxin
kuènte tí Jínahya
(Mt. 12.22-32; Lc. 11.14-23; 12.10)*

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxa kjéhya ch'ín Jesús ntá ikui sín sátsjiko sín ch'án k'ixin ntáchro sín k'ixin ó tsík'ixikján ch'án.

22 Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuēhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

23 Ntá ch'ín Jesús k'uíyēhe ch'án tí sín ntá kjuíncheyóēxin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? 24 A ntá tí sín t'etoan ijnko nación tjanjonko kichó la tsjachahya ts'etoan.

25 La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín.

26 A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuēnte.

27 Ninkexró tsjacha ts'ixenhen ntōe ijnko chojni jīēhe kixin ts'axrjehe tí nkehe chóna ch'án. Náhí. T'ichjánxin saoxín sinchenteto ch'án tí ch'ín jīēhe kixin jína tseéhe ch'án nkehe chóna tí ch'ín a.

28 'Ijnko nkehe chaxín tsotjonkará kixin tió tsoxraxinkaon ijnko chojni tí jīē chóna la ko tsochronōēhe Dios la ntá tsjakjīnhin ch'án kaín tí jīē la ko kaín tí nkehe jínahya tsíntáchro sín. 29 A ntá tí nkexro ts'ántaxínhin tí Nchakuen Dios na mé xitjahya tsjīn tí jīē na mé jnkochrīxín tsochóna sín tí jīē a —ichro ch'án.

30 Mé xikaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

*Tí ìné la ko kichó ch'ín Jesús
(Mt. 12.46-50; Lc. 8.19-21)*

³¹ A ntá kui ìné ch'ín Jesús la ko kichó ch'án tjejó sín ntója ó na ntá k'uetuenhen sín ijnko chojni tsjik'íyehé ch'án. ³² A ntá tí sín tjejótjaxin tí tjen ch'ín Jesús ntiha chénka sín ch'án kixin:

— Ìná la ko kichuá tjejó sín ntója xritjeyá sín ti jaha. — ichro sín.

³³ Ntá ntáchro ch'án kixin:

— ¿Xá nkexro tí nana la ko nkexro tí kichiná? — ichro ch'án.

³⁴ Ntá komá ch'án tí chojni tjejótjaxin tí tjen ch'án ntá ntáchro ch'án kixin:

— Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana — ichro ch'án.

4

Kjuíncheyóexin ch'án éxí ijnko chojni t'enka nonte (Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárcó tjenkátaón ntá k'uí't'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kúitohe sín chrínta ntayaon k'uejókinhin sín. ² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ — Tinhínrá tíhi: Ijnko chojni sákjuík'enka nontee. ⁴ Mé xikaha sákjuík'enka ch'án iso tí noatrigo a. Ntá iso noa la tsík'ánótjen ntia ntá kui koxroxé k'uínka va tí noa. ⁵ A ntá iso noa na mé k'uí'tji chrík'á xro tí kohya ítsjé nche ntá tjoka k'uayan kixin tjínhya chóna nche. ⁶ A ntá tíó kjuíton yaon la ntá tí ka la chján; la ko chóntahya

nuèe a ntá xámá. ⁷ A ntá í so noa kjuítsínkak'á tí siín kach'i la ntá tí kach'i k'uánkí la ntá tí noa í k'ónahya kíxin sítja tí kach'i. ⁸ A ntá íso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kíxin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kíxin nkexrí t'axrjexín tí nkehe kjuíncheyóxin ch'án. ¹¹ Ntá ntáchro ch'án kíxin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuintayóaxuán kaín nkehe kuínhin sín. ¹² Kíxin kjónté ts'ikon sín la éxí k'uíkonhya sín, la ko kjónté tsinhin sín la tsienxínhya sín kíxin ntá chrók'uixitoxinhya tí tjenkayáxin sín a la ko chrókjuinhya tí ijié sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákuík'enka

(Mt. 13.18-23; Lc. 8.11-15)

¹³ Ntá ntáche ch'án sín kíxin:

* 4:12 Isaías 6.9-10

—¿Á kiénxinhyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxinrá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuíkjako itén Dios. ¹⁵ A ntá iso chojni la éxí tí tje kjuítsínka ntja; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín. ¹⁶ A ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁷ Kjánchó nínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxí yóhe tí tje k'uínka chrík'á kach'i na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuínkáchónki sín la ntá xíkaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuíncheyóexin éxí ijnko xrohi tjeche

(Lc. 8.16-18)

²¹ Kjaxin ntáchro ch'ín Jesús kixin:

—¿Á chrókuikaonni xrohi tjeche chrókjuak'emá chrínkí ntacajón o chrínkí cama? Kjá náhí. Tí

xrohi la noi chrókjuak'e ts'inkaséyanxín. ²² Mé xíkaha kaín tí nkehe tjejó má jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá. ²⁵ A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijnko tje ts'ayan ts'ánki

²⁶ Kjaxin ntáchro ch'ín Jesús kixin:

—Tí kjuachaxin t'etoan Dios tóyóhe ijnko chojni sátsjik'enka nonte. ²⁷ Ntá sákjuik'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánki. A ntá tí nkexro k'uenka la noehya ch'án nkexrí kónhen tíha. ²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuinta, a ntá chr'éxin icha tí noa tsjinjin; ²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

Ch'ín Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

³⁰ Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etoan Dios, nkehe chrókóyóexin tíha? ³¹ Mé éxi yóhe tí tje it'in

mostaza tsík'inka nonte. Tíha mé ijnko tje imá ntsí, a ntá tí í so tje siín chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

Nkehe tí xrā kjuích'e tí nkehe kjuíncheyóexin ch'ín Jesús

(Mt. 13.34-35)

³³ Mé xikaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha. ³⁴ Kaínxín nkehe kjuakohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

Ch'ín Jesús k'uetuēhen ch'án tí xrinto la ko tí nta síchrica kixin ts'ixita

(Mt. 8.23-27; Lc. 8.22-25)

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxā tjenkáya ch'án tí ntabárc̄o la ko kjaxin í so ntabárc̄o sákjuí koí. ³⁷ Ntá xríñahya tjian chjéhe xrinto la ntá síchrica ntā t'ixenhen tí ntabárc̄o, ó mero tsokaón ntā tí ntabárc̄o. ³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárc̄o a tjejkjón ch'án ijnko ka. Na ntá kjuínchekjàya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uàya ch'án, k'uətuənhen ch'án tí xr̄nto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xr̄nto la ko tí ntá k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuénté kixin imá chrakonrá? ¿Á naxa tin-kachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xr̄nto la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara

(Mt. 8.28-34; Lc. 8.26-39)

¹ Ntá tió k'uátòye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabáro a. Ntá xrínahya xeta ch'án ijnko ch'ín kuixin nó tsíkji xravá chojni mé chóna ch'án ijnko nchakuen tí jínahya. ³ Tí ch'ín a mé kjuák'e ch'án tí tsíkji xravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchríton ch'án kjuínchekuen ch'án tí cadena. Kohya ninkexro tjacha ts'ətuənhen tí jehe ch'án. ⁵ K'uék'aji ch'án nchakotjin la ko tie t'íyato ch'án nó jna la ko tí tsíkji xravá chojni la ko chjéhe asén ch'án xro. ⁶ Na ntá k'uíkon ch'án kixin kui ch'ín Jesús kjónté ikjín la

kuinká ch'án kjuíji ch'án kjuák'exín toch'in ch'án nkayakon ch'ín Jesús a ⁷k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tìtohé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóhe ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá siín nchónhya cochíno xrine va chjinaxón tí jna ntiha. ¹² A ntá chrónòà tí nchakuen tí jínahya ntáchro kixin:

—Tétuènhènni sátsjini tí siín tí cochíno, tìtohé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka

sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchónta tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án iké ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a. ¹⁷ Ntá kjuankixin sín chrónóehe sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárcō na ntá tí ch'ín k'uéchónta nchakuen tí jínahya na mé chrónōa ch'án kixin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjónhya ch'án kjuachaxin sátsjiko sín ch'án. Náhí. K'uetōan ch'án kixin:

—Sátjia ntoa tjíchenka tí sín naxa kjéhya tí jaha kixin nkexrí kaín tí kjuaxroan jié kjuasin Dios kjuínchekitoḥa jína kuikonóḥa ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankixin chrónka ch'án kaín tí chjasin kuente Decápolis kixin nkexrí kaín tí nkehe kjuích'e ch'ín Jesús kjuínchekitoḥe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Lc. 8.40-56)

²¹ Ntá tió xíkankāo ch'ín Jesús tí ntabárcō tóhe tí ntayaon inaá ntá kóchjina nchónhya chojni ntá ntahó chrínta ntá kuítóhe ch'án inaá. ²² Na ntá ikui ijnko ch'ín t'etōan kuente nínko mé it'in ch'án Jairo. A ntá tió k'uíkon ch'án kixin itjen ch'ín Jesús

ntá kjuák'exín toch'in ch'án chrínkí toté ch'ín Jesús a ²³ imá chrónóehe ch'án kixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuitohe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án ínaá. ²⁵ A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan kixin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí titóehya tjan jína la íchá ntsí tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, ²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuitohe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuítóhe tjan jína ti chin k'uéchóna tjan. ³⁰ Ntá ch'ín Jesús na ó kónohe ch'án kixin kjuachaxién ch'án mé kuítóexín ijnko chojni jína ntá kuinkátjía ch'án kjuanchankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

³¹ Ntá kjuátehe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankiá kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxin tí ké ch'án.

³³ Ntá tí tjan a na mé chrakon tjan síxrànkə tjan ó

nohe tjan kixin ó kuítóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntóa la ó kuítóha jína a —ichro ch'án.

³⁵ Na ntá naxa tjenixja ch'án ntá ó kui chojni kuixin sín ntóe tí ch'ín t'etóan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuénté naxa chjehé xrá tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etóan tí nínko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. ³⁸ Na ntá tió kjuíji sín tí ntóe tí ch'ín t'etóan tí nínko na k'uíkon sín kixin imá sítjité sín tsjánkàma sín tí xjan a. ³⁹ Ntá k'uíxenhen ch'ín Jesús nchia kjuanchankí ch'án kixin:

—¿Nkekuénté ánta tjasitérá tsjánkàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetóan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uíxenko sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuanhan kixin t'aya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xikaha. ⁴³ Ntá fuerte k'uetōan ch'ín Jesús kixin chróchenkahya sín ninkexró. La kjaxin k'uetōan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret (Mt. 13.53-58; Lc. 4.16-30)

¹ A ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án. ² Na ntá tió kui tí yaon t'ok'éhe sín ntá kjuankíxin ch'án kjuakoxin ch'án tí ninko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohē tí ch'ín i kaín tíhi? ¿Nketí kuixin tí kjuaxrexinkaon chóna ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntōe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitohe ch'án sín jína. ⁶ Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios
(Mt. 10.5-15; Lc. 9.1-6)

⁷ Na ntá k'uíyehē ch'ín Jesús tí teyó sín k'uajiko ch'án a. Ntá kjuankíxin k'uetuēnhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni. ⁸ La ko k'uetōan ch'án kixin ninkehó tsjikohya sín kuēnte ntia. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokate ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kixin:

—A ntá tí ts'ixenhénrá ijnko nchia a ntá ntaha tsjanjon sín kjuachaxin na ntahó chókuitōhará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjnra tí nche chóna totará kixin xikaha tsjakoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitoexín ijié chojni ntá antsí má tsjasóte tí chojni tí chjasin a, a ntá

tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuitóxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuitohe sín jína.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etoan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanchia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. ¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

19 Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya ²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehé ch'án tí síxreé la ko tí sín k'uɛtuɛnhen tí sín soldado la ko tí sín t'etɔan estado Galilea kixin itsi sín ntɔe ch'án kixin síín kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'etɔan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan ìné tjan kixin tsíntáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. ²⁷ Na ntá tuénxín k'uetuēnhen ch'án ijnko ch'ín soldado kixin tsjikao ch'án tí kja ch'ín Juan a. ²⁸ Ntá tí ch'ín soldado mé sákjuí ntoechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan iné tjan.

²⁹ Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpoe ch'án ntá kjuikao sín ntá sákjuíkjavá sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. ³¹ A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásítji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárco sákjuí sín ijnko nonte jehó tjen. ³³ Na ntá itsjé chojni k'uíkon sín kixin sákjuí sín la ko kjuátsoan sín kixin ch'ín Jesús. Ntá xrákuaxin sín chjasén sín kuinká sín na

ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajinxin ch'án tí ntabárc̄o, a ntá k'uíkon ch'án kixin nchónhya chojni síin ntiha ntá kuikonóh̄e ch'án tí jehe sín na mé éxí yóh̄e kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakoh̄e ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókujtóh̄e sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'ín Jesús kjuát̄ehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuát̄ehe sín ntáchro sín kixin:

—¿Á tsjik'enani iyó ciento denario niot̄ja tsochjéheni sín sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín niot̄ja chontará? Sátjít̄sjeherá —ichro ch'án.

Ntá sákjuít̄sjehe sín na ntá chrónka sín kixin:

—In'ó niot̄ja la ko yaá koche mé síin —ichro sín.

³⁹ Na ntá k'ueṭoan ch'án kixin kaín xín sín chrók'uixit̄jaxin sín tí chrítaón tí ka yoa a. ⁴⁰ Na ntá xikaha kójnkojié sín ciento sín la ko cincuenta sín k'uixit̄jaxin sín. ⁴¹ Na ntá ch'ín Jesús kuákja ch'án tí in'ó niot̄ja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ò ch'án tot'ò tí niot̄ja a ntá chjéhe ch'án tí sín k'uájiko ch'án kixin ts'óxikayehe sín sine tí sín síin a la ko kjaxin kóchrít'ò ch'án tí yaá koche ntá

k'óxi_kay_ehe sín kixin sine sín kaín sín. ⁴² Ntá kaín xín sín k'jóné sín kókjehe sín. ⁴³ A ntá kjuixin k'jóné sín ntá tí sín k'uájiko ch'ín Jesús na mé kjuínchekaón sín teyó ntaxra tot'ò tí niotja la ko tí koche tsíxehe. ⁴⁴ A ntá tí sín k'jóné na mé in'ó mil chojni ntoa.

Ch'ín Jesús mé tjitaón ntayaon
(Mt. 14.22-27; Jn. 6.16-21)

⁴⁵ A ntá tuénxín k'uetuēhen ch'ín Jesús tí sín k'uájiko ch'án kixin ts'it'ótjen sín tí ntabárcō a ts'atōye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehe ch'án kaín tí sín siín a. ⁴⁶ Kjuixin nixjehe ch'án sín na ntá jehe ch'án chrīn ch'án ijnko jnā tsonixjeexín ch'án Dios. ⁴⁷ A ntá tió k'uixin tie ntá tí ntabárcō na mé ó kjuji jnkosiné ntayaon, a ntá jehe ch'án jehó ch'án kjuji ch'án chrínta ntayaon. ⁴⁸ Ntá kotohe ch'án k'uikon ch'án kixin imá xra tjiko sín tí ntabárcō a kixin tí xrintō imá chjehe. Nantōye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjuí ch'án. ⁴⁹ A ntá tí k'uikon sín kjuítaón ch'án nta, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uikon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xrintō la ó k'uixratá. Ntá imá chrakon sín kixin xikaha kónhen ⁵² kixin kienxínhya sín tí kjuaxroan kjuích'e ch'án kuènte tí niotja kixin naxa kénhya asén sín kuinkáchónki sín ch'án.

Ch'ín Jesús mé kjuínchekitohe jína tí chojni níhi tí nonte Genesaret
(Mt. 14.34-36)

⁵³ Ntá tió k'uátòye sín tí ntayaon ntá kjuíji sín tí nonte Genesaret ntá kjuak'echrøe sín tí ntabárco a tí chrínta ntá. ⁵⁴ Na ntá tió k'uínkajinxin sín tí ntabárco, a ntá tí sín siín ntiha tjoka kjuátsoan sín tí ch'ín Jesús. ⁵⁵ Ntá sákjuí sín nkuíxín chjinaxón ntiha kjuankíxin sín kuikao sín tí sinníhi tinkátsénkí sín kuikao sín tí tjen ch'ín Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sinníhi a chrínta ntá. Na ntá chrónóhe sín tí ch'ín Jesús kíxin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita asén chojni
(Mt. 15.1-20)

¹ A ntá iso sín fariseo la ko iso tí sín tjako tí ley kuixin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kíxin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kíxin kjuínchexiteyáhya sín tí ley, ntá kjonta tí sín a. ³ (Mé xikaha kjuích'e sín kíxin tí sín fariseo la ko kaín tí sín judío mé kuinkáchónki sín éxí k'uékjich'e tí sín táda ósé kíxin ná t'òntó itja sín ntá sine sín. ⁴ Na ko tí tsokjanxin sín ntasin ná t'ónti sín ntá sine sín. Na ko kjaxin itsjé í so nkehe tinkáchónki sín, éxí tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kàmé sín nchetjóá

sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjó ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etoan chojni ó.*

Mé xikaha ichro itén Dios. ⁸ Ntá jahará kuítóhérá tí nkehe tsík'etoan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha títóhérá ntáha tí nkehe tsík'etoan Dios.

¹⁰ Tsintáchro ch'ín Moisés kixin: “Tsochonteherá kjuasáyé it'ará la ko inará”, la ko “A ntá tí nkexro t'ántaxínhin it'é o iné la chrók'óyán sín.”† ¹¹ A

ntá jahará ntáchrórá kixin ó nchoxon kixin ijnko nkexro tsochénka it'é la ko iné kixin: “It'éni, Ìnéni, chrokjuahya tsjinkitsani tí jaha kixin kaín tí nkehe

* **7:7** Isaías 29.13 † **7:10** Éxodo 20.12; 21.17

chóntani mé k'óna Corbán” (mé t'axrjexín kixin kaín tí chichaon k'uáyéhe Dios). ¹² A ntá xikaha jnkojín nkexro tsontáchro ch'án tíhi ntá jahará tsontáchrorá kixin í t'ichjánxinhya tsjinkitsa ch'án tí it'é ch'án la ko tí ìné ch'án. ¹³ A ntá tí xikaha la tìtohérá tí nkehe tsík'etoan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

¹⁴ Na ntá k'uíyehé ch'ín Jesús tí chojni ínaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tió kuitóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie ¹⁹ kixin jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kixin tí nkehe sineni la jehya jie.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jie táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kíchuará, la ko tí tjinkáonrá tsochontará chojni chjin ókjé, la ko tí t'oyán kíchuará ²² la ko tí chrókuđerá, la ko tí tjaké asánrá tí nkehe chóna ókjé sín, la ko tí jínahya

ch'ehérá kichuárá, la ko tí kjuach'ia xríkoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína. ²³ Kaín tí nkehe jínahya a mé t'axrjeníxin chojni, la mé tjasixín sín jie.

Ijnko tjan tsíkjiixin kjín mé kuítekaon tjan tí ch'ín Jesús

(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakon-hya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko iné ijnko tjan tjarisoá chóna ijnko nchakuen tí jínahya mé kuínhin nkehe tí xra ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. ²⁶ Na mé jehe tjan tsíkjiixin kjín, na mé tsíkjiixin tjan nó nación Sirofenicia. Na ntá jehe tjan a mé kui tjan chrónóehē tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátehe ch'án kixin:

—Títohé senó chrókjóne tí xjan. Jehya tí jína chrókuakítsjaha xjan tí niotja ntá chrótjaha konia chrókjóne va —ichro ch'án.

²⁸ Ntá jehe tjan kjuátehe tjan ntáchro tjan kixin:

—Chaxín xikaha, Inchéni. Kjánchó kjónté tí konia tjejoyánkí mesa ine tí tot'o niotja tóxènjín tí chánjan —ichro tjan.

²⁹ Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kíxin tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntøe tjan, na ntá k'uikon tjan kíxin tí xjeen tjan na mé ó ntoá tjetsínkaták'á xjan tí cama kíxin ó tsík'axrje tí nchakuen tí jínahya a.

Ch'ín Jesús mé kjuínchekitøhe jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kuikao sín ijnko ch'ín tienhya na ko ntoáhya nixja ch'án. Ntá chrónøehe sín tí ch'ín Jesús a kíxin tsjak'etja tja ch'án chrítaón kja tí ch'ín a kíxin tsitøhe ch'án jína. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhén ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxin ch'án nejen tí ch'ín nixjahya a. ³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kíxin:

—Efata —mé t'axrjexín nkívee sín kíxin: ¡Tsoxitjehe!

³⁵ Na ntá tuénxín xítjehe tatsjon tí ch'ín tienhya ntá kuínhin ch'án la ko kuítøhe jína tí nejen ch'án, ntá jína nixja ch'án. ³⁶ Ntá ch'ín Jesús k'uøtoan ch'án kíxin ninkexró tsochenkahya sín. Ntá kjónté imá k'uøtoan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kíxin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni

(Mt. 15.32-39)

¹ A ntá ijnko yaon nchónhya chojni k'uíxikóchjina inaá. A ntá chóntahya sín nkehe sine sín. Na ntá ch'ín Jesús mé k'uíyehẹ ch'án tí sín k'uájiko ch'án, a ntá ntáchro ch'án kixin:

² —Imá tikonóahą kaín tí sín i kixin ó ní yaon tjékian sín ntihi ntá chóntahya sín nkehe sine sín.

³ Ntá chrókuétuąnnya sín sáchrókjui sín ntọe sín tí naxą nehya sín kixin ntia ó chrókótięnxin sín kixin iso sín la imá kjín tsíkjixin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuęnhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ọ ch'án tí niotja a. Ntá chjéhe ch'án tí sín k'uájiko ch'án kixin jehe sín ts'ókıkayehe sín tsakja kaín xín tí sín siın a. ⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá

k'uetōan ch'án ts'óxíkayehē sín kjaxin. ⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'o tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabáro a sákjuí sín nó tí nonte Dalmanuta.

*Tí sín fariseo tjanchia sín ijnko kjuaxroan jié
(Mt. 16.1-4; Lc. 12.54-56)*

¹¹ Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuènte nkaya nkajní kixin tjinkaon sín chrókjuachaxin sín ch'án. ¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

¹³ Na ntá kuítóhe ch'án tí sín a, ntá xík'it'ótjen ch'án tí ntabáro ntá sákjuí ch'án í jnko tóhe ntayaon inaá.

*Tí xroan nchek'ánki tí niotjé tí sín fariseo
(Mt. 16.5-12)*

¹⁴ Ntá k'uitjáyenhen sín tsíkjikohya sín nkehe sine sín. Jehó jnkokoá niotja chóna sín nkaxenhen tí ntabáro a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroan nchek'ánki niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuénté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'ó niotja naxa kjuenájinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'ó niotja kjuenájinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjónté xikaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jína ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóehé sín tí ch'ín Jesús kixin chrókjuinchekitohe ch'án jína tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

24 Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

25 Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uíkonhya kuítóhe ch'án jína la jína t'ikon ch'án kaín nkehe.

26 Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixēnnya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

27 A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

28 Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

29 Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátēhe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

30 Ntá k'uetōan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)*

³¹ Na ntá kjuankíxin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte n̄inko la ko tí sín t'etoan kuènte tí sín nch̄at'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxian éxi tjenkayáxin chojni ó —ichro ch'án.

³⁴ Ntá ch'ín Jesús mé k'uíyeh̄e ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkojínrá tjinkáonrá tsochréhérá tí janhan na t'ichjánxin ts̄itohérá kaín tí nkehe tjaké asanrá na ntá tsamárá tí ntacruz kuèntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjuacha ijnko chojni chróchóna kaín nkehe siín chjasintajni, a ntá kjuachón chrókjuinçek'itjáyan? ³⁷ ¿Nkehe chrókjuenk̄a chojni kixin chróchóna tí kjuachón? ³⁸ A ntá jnkojín nkexro tsosueh̄e kixin tinkáchónki tí janhan la ko tí tan kuèntana nkayakon tí chojni

jínahya chón̄ta jie la k̄j̄axin tí Xjeen Dios K'óna Chojni tsosuehe ch'án tsontá̄chro ch'án k̄ixin chón̄xin ch'án tí jehe sín tió tsokjan ch'án tsik̄ao ch'án tí k̄juachaxin jié kuènte It'é la ko tsik̄ao tí sín ángel.

9

¹ Na ko k̄j̄axin chrónka ch'ín Jesús k̄ixin:

—Chaxín ntáxr̄jan k̄ixin isorá tjejorá n̄tihi la n̄axa ts'énhyará ts'ikonjiará itsi tí k̄juachaxin ts'et̄oan Dios —ichro ch'án.

*Ch'ín Jesús mé k'uíxitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjūiko ch'án ch'ín Pedro la ko ch'ín Jacobo la ko ch'ín Juan sákjūi sín jehó sín ijnko jn̄a noi. Ntá n̄tiha mé xr̄ināhya k'uíxitoxin ókjé nkexrí tsjehe ch'án k'uíkon tí jehe sín. ³ A ntá iké ch'án tsík'óna imá tják̄ini la ko imá tjóá éxí chrinta tsjehe, a ntá n̄tihi ch̄jasintajni kohya ninkexró chrókjuen tí ka chrókuit̄ohe imá tjóá x̄ikaha. ⁴ Na ntá titàya k'uíkuèn sín n̄tiha itjen tí ch'ín Elías la ko tí ch'ín Moisés tjejót̄jo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús k̄ixin:

—Maestro, jína k̄ixin tjejóni n̄tihi. Chrókjuich'énani iní nchia la mé ijnko kuèntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé x̄ikaha ichro ch'án k̄ixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xr̄ināhya ikui ijnko tjūi k̄juák'etja chrítaón kaín xín tí tjejó sín. Na ntá chríkjan tí tjūi kuínhin sín itén ijnko nkexro nixja na mé ntá̄chro k̄ixin:

—Tí nkexro i mé xjanna. Imá tjuahā ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxín sín tí jna ntá k'uetōan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejótjo sín kixin nkehe t'axrjexín tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxín tsjasóte la ko tsotjinkakonhya sín. ¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhjn sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

Ch'ín Jesús mé kjuínchekitōhe jína ijnko xjan chóna ijnko nchakuen tí jínahya

(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxin ntaha siín tí sín tjako tí ley ikjo tí jehe sín. ¹⁵ A ntá tuénxín tió

k'uikon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín i? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítixin ir'va xjan na netaón xjan neno xjan na méxra tjeheya xjan. Ntá xrjanóaha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákōará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uikon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntáloxrjo ir'va xjan.

²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan. ²² A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan ìnta kixin tjinkaon chrók'óyán tí xjan

a. A ntá jaha ¿á tsjácha tsjínkítsani? La tikonóéhéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuènté tjanchankìna kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Íjie la tétuanhan kixin t'axrjéxian tí xjan na ko tsìtohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjexín ntiha. Na éxí tsík'en xjan xíkaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxenhén sín ijnko nchia. Ntá jehe sín kjuanchankíhi sín ch'án kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxìn kixin nchónhya tsochronóéhérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án
(Mt. 17.22-23; Lc. 9.43-45)

³⁰ A ntá tió sákjuíxin sín ntiha ntá k'uaátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín ³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjexín tíha.

¿Nkexro tí imá tjeoan?
(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kíchuará tí kuini ntia? —ichro ch'án.

³⁴ Ntá jehe sín la táníkoá sín kixin tí ntia kui sín tinkákjo kíchó sín kixin nkexro tí imá ts'etjoan.

³⁵ Ntá ch'ín Jesús mé kjuák'etjaxin ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkójínrá tjinkáonrá chrókuétoanrá má ntá t'ichjánxin kixin tsjixixín tsochréhérá kaín sín, ts'ítuanhanrá la ko tsjínkĩtsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

37 —Tí jnkójín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxin éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkitsa tí jeheni

(Lc. 9.49-50; Mt. 10.42)

38 A ntá ch'ín Juan mé ntáchro ch'án kixin:

—Maestro, k'uíkonni ijnko chojni na mé kjuachaxin ihniá mé takitsjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikohyani ch'án —ichro ch'án.

39 Ntá ntáchro ch'ín Jesús kixin:

—Nté títóhé ch'án kixin ninkexró tjasixín kjuaxroan kjuachaxin nina la tuénxín chrókjuacha chrók'uántaxína sín. 40 Tí nkexro ninkakuenhyani la mé tjinkitsa tí jeheni. 41 A ntá jnkójín nkexro tsotjáhará kjónté ijnko vaso ìnta tsjanjonxín sín nina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

42 A ntá jnkójín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jína chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án ntayaon. 43 A ntá tí itjá tjasixián jie na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuíxian tí siín xrohi xitjahya

ts'an_{ka}, ⁴⁴ tí síin kos_{int}o t'en_hya la ko síche xrohi ts'an_{ka}h_{ya}. ⁴⁵ A ntá k_{ja}xin tí to_tá t_{ja}sixián j_{ie} na íchá jína chrókochrín_{ji}an k_{ix}in k_{jo}nté jnkokoá to_tá mé tsochontaxián k_{ju}achón. A ntá tí yóí to_tá la tíha sáchrók_{ju}íxian tí síin xrohi xit_{ja}h_{ya} ts'an_{ka}, ⁴⁶ tí síin kos_{int}o t'en_hya la ko síche xrohi ts'an_{ka}h_{ya}. ⁴⁷ A ntá tí ikuan t_{ja}sixián j_{ie} na íchá jína chrókuakitsjenkiá tí kuan a k_{ix}in k_{jo}nté jnkokoá kuan mé sáchrók_{ju}ia tí t_{je}n Dios t'et_oan. A ntá tí yóí kuan la tíha mé sáchrók_{ju}íxian tí síche xrohi ⁴⁸ tí síin kos_{int}o t'en_hya la ko síin xrohi ts'an_{ka}h_{ya}.

⁴⁹ 'A ntá kaín nkexro t'ichján_xin ts_{ja}sóte. A ntá kaín nkehe ts'áyé_{he} Dios chón_{ta} x_{ij}nta. ⁵⁰ Tí x_{ij}nta la jína. A ntá tí chrók'uankehe tí jní la ntá xit_{ja}h_{ya} chrókójní ínaá. Jahará mé chrókóyó_{ha}r_á éxí x_{ij}nta k_{ix}in k_{ju}axró_xin chrók'uejokoár_á kíchuár_á —ichro ch'án.

10

*Tjako ch'ín Jesús k_{ix}in chrók_{ju}áke_hya kíchó sín
(Mt. 19.1-12; Lc. 16.18)*

¹ Na ntá ch'ín Jesús mé k'uaxr_{je}xín ch'án ch_{ja}sin Capernaum sák_{ju}í ch'án nó estado Judea la ko nó tóhe nt_{ar}ío Jordán. Ntá nchón_hya chojni kójnkotsé sín tí t_{je}n ch'án ntiha. Ntá k_{ju}ako_{he} ch'án tí jehe sín k_{ix}in x_{ik}aha kuè_nhen ch'án. ² Ntá iso sín fariseo mé kóchjinehe sín ch'án k_{ju}anchankí_{hi} sín ch'án nkehe, chrók_{ju}achax_{in} sín ch'án. Ntáchro sín k_{ix}in:

—¿Á síin k_{ju}achaxin ts_{ja}ke_{he} chojni ntoa ichjién? —ichro sín.

³ Ntá k_{ju}áte_{he} ch'án ntáchro ch'án k_{ix}in:

—¿Nkehe tí k'uetuanhanrá tí ch'ín Moisés?
—ichro ch'án.

⁴Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

⁵Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetoan ch'án ts'óna tí xroon a. ⁶Kjánchó tí xrankíxixín tió kjuích'éna Dios kaín xín nkehe la kjuích'éna ch'án ijnko chojni nto a la ko ijnko chojni chjin.* ⁷Méxra tí chojni nto a tsítóhe ch'án tí it'é ch'án la ko iné ch'án kixin tsakja ch'án ichjién ch'án ⁸ntá yóí sín ts'óna sín éxí jnkokoá chojni. Méxra jehya yaá chojni. Náhi, jnkokoá.† ⁹Na mé xikaha tí kjuachaxin kuénte Dios kójnkojiéxín sín ntá jehe sín chrók'uitjéhya kichó sín —ichro ch'án.

¹⁰A ntá tjejó sín nchia ntá tí sín k'uajiko ch'án a mé kjuanchankíhi sín ch'án inaá kixin á xitjahya ts'itjíhi kichó sín. ¹¹Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjáchehe ch'án tí tjan tsíkótehe ch'án saoxín. ¹²La ko kjaxin tí chojni chjin tsíkjákehe xii tsakja tjan í jnko chojni nto a na mé xikaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uajiko ch'án mé kóninkakonhen sín tí sin kjuíkao xjan.

* **10:6** Génesis 1.27; 5.2 † **10:8** Génesis 2.24

14 Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté títóhérá tí xjan tsoxrakoa tí tjén janhan la t'inkakuènyará xjan kixin tí sín kuènte kjuachaxin kuènte Dios la mé tóyóhé éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etóan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús (Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrixin? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro mé jína la tíha mé Dios.

¹⁹ Ntá jaha ó noha kixin nkexrí k'uetóan Dios kixin: “Chrókjuacheéhya kichuá la chrók'oyánhya chojni la chrókueehya la chrókjóntahya kichuá la chrókjuich'iahya la ko chróchontehé kjuasáya it'á la ko iná”‡ —ichro ch'án.

²⁰ A ntá jehe ch'án kjuátēhe ch'án ntáchro ch'án kixin:

—Maestro, kaín tíha kjuínchexiteyáni desde nta-soáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

‡ 10:19 Éxodo 20.12-16; Deuteronomío 5.16-20

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

²³ Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etōan —ichro ch'án.

²⁴ Ntá tókakohen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekohen tí nkehe chóna sín na imá xra ts'ixenhen sín tí tjen Dios t'etōan. ²⁵ Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etōan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

29 Ntá kjuátēhe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntōe sín la o tí kichó ntoa o tí kichó chjin la o it'é o ìné sín o ichjién sín o xjeen sín o nontēe kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón ³⁰ na mé ntihi chjasintajni tsochóna sín ciento veces nchónhya ntōe sín la ko éxí kichó sín la ko éxí ìné sín la ko éxí xjeen sín ts'ikon sín itsjé chojni kjé la ko éxí nontēe sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochóna sín tí kjuachón jnkochrín. ³¹ A ntá itsjé tí sín t'etōan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etōan sín tí ntaha.

*Nixin chronka ch'ín Jesús kixin its'en ch'án
(Mt. 20.17-19; Lc. 18.31-34)*

³² Ntá tjejótti sín chrìn sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyēhe ch'án jehó tí teyó sín ínaá ntá kjuankixin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'a t'etōan la ko tí sín tjako tí ley. Ntá ts'etōan sín kixin its'en ch'án. Ntá sinchek'áyēhe sín ch'án tí sín jehya judío. ³⁴ Ntá jehe sín la tsjanoá sín tí jehe ch'án la ko ntaté sín tsjikite sín ch'án la ko tsjate sín ch'án ntá ts'óyán sín ch'án. Kjánchó tí yaon nixin mé tsoxechón ch'án ínaá —mé xikaha ichro ch'ín Jesús.

*Ch'ín Jacobo la ko ch'ín Juan tjanchia sín nkehe
(Mt. 20.20-28)*

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétqanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan. ⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsikónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kónínkakonhen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'et_oan chjasintajni la imá t'et_uenhen sín kaín chojni la ko tí sín imá tjet_oan mé imá nchehnkehe asén sín kixin ihyé sín ts'et_oan sín. ⁴³ Kjánchó jahará la xikahya chrókjuich'erá. Náhí. Tí jnkojín_rá tjinkáon_rá chrókuét_oan_rá la chrókjuínk_itsará tí í so sín. ⁴⁴ A ntá tió jnkojín_rá ant_sí chrókuét_oan_rá mé t'ichjánx_in senó chrókjuáko_xín_rá chrókjuich'eherá kichuárá x_ra. ⁴⁵ Kixin tí Xjeen Dios K'óna Chojni mé kuih_ya ch'án kixin chojni chrókjuich'ehe ch'án x_ra. Náhí. Ikui ch'án kixin sich'ehe ch'án sín x_ra la ko ts'enyákonh_en nchónh_ya chojni kixin tsaáxin sín ch'án —ichro ch'án.

Ch'ín Bartimeo k'uék'ikonh_ya ch'án ntá ch'ín Jesús kjuínchekitohe ch'án jína
(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónh_ya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonh_ya mé it'in ch'án Bartimeo ntá it'é ch'án mé it'in Timeo. Tjetj_xín ch'án chrínta nt_ia tjanchak'á ch'án. ⁴⁷ Ntá kuínhin tí ch'ín t'ikonh_ya kixin ó kuichjina ch'ín Jesús, mé tí nkexro kjuix_in chjasin Nazaret, ntá tí ch'ín t'ikonh_ya kjuankíxin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónh_ya sín k'uet_uenhen sín ch'án kixin tsotáni ch'án. Ntá íchá ant_sí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

49 Ntá ntahó kjuák'e ch'ín Jesús. Ntá k'ueṭoan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

50 Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

51 Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

52 Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekáván tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uixenhen ch'án chjasin Jerusalén (Mt. 21.1-11; Lc. 19.28-40; Jn. 12.12-19)

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'ueṭuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá

tjasíntankehérá va ntá tsjikoanará va ntihi. ³ A ntá tí jnkojín chojni tsjanchankíhará sín kixin nkekuènté xíkaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuas-intankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xíkaha ch'erá tjasíntankehérá tí kolócho a? —mé chro sín.

⁶ Ntá kjuáteexín sín éxí k'uetoan ch'ín Jesús. Ntá kjuanjon sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráqo sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnjé Ìnchéni. ¹⁰ Jína tí kjuachaxién Dios itsi mé ts'etuēhen tí nkexro k'uaxrjeníxin it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí n̄nko jié tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakonhen ch'án ijnko nta t'óna to higo tsík'ónahya to
(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjehe ch'ín Jesús tí nta t'óna to higo k'uētuenhen ch'án tí nta kixin:

—Í ninkexró sinehya tí to ts'óna tí jaha ínaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án nínko
(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uíxehen ch'ín Jesús nkaxenhen nínko a. Ntá kjuankixin ch'án k'uinkité ch'án tí sín nchekjixin nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixin sín chichaon la ko tí silla tjejójen tí sín nchekji kontóá ¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín nínko. ¹⁷ Ntá kjuakohē ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkjich'énará itjueé xíchee* —ichro ch'án.

¹⁸ Ntá tí sín nchat'á t'etōan la ko tí sín maestro tjako tí ley na mé kuínhin sín tíha, ntá kjueyá sín

* **11:17** Isaías 56.7; Jeremías 7.11

nkexrí chrók'óyán sín ch'án, kjánchó chrakon sín kixin kóxrjínhìn tí chojni tí nkehe kjuako ch'án.
 19 Kjánchó ntá ó kóntó ntá k'uaxrjexín ch'án tí chjasin a sákjuí ch'án.

*Ó tsixámá tí nta t'óna to higo
 (Mt. 21.20-22)*

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsixámáxin nuèè tí nta.

²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakhén jna na ó tsixámá nta —ichro ch'án.

²² Ntá kjuátēhe ch'ín Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjikjianiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrórá, ntá xikaha chaxín tsonhen.

²⁴ Mé xikaha ntáxrjan kixin kaín tí nkehe tsjancheherá Dios tí tsitekáonrá kixin chaxín ts'ayéherá ntá xikaha tsonhen tsoxiteyá. ²⁵ A ntá tió tjejonixjehérá Dios ntá jnkojín nkexro naxa ninkákonhénrá, la chrók'uitjáyánhanrá tíha kixin It'ará tjen nkaya nkajní kjaxin chrókjuinçek'itjáyan ch'án tí jiē chontará. ²⁶ A ntá tí sinček'itjáyánhyará tí ijiē chojni ntá It'ará tjen nkaya nkajní la kjaxin sinček'itjáyánhya ch'án tí jiē chontará.

Tjanckankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

27 Ntá xíkjan sín chjasin Jerusalén inaá. Ntá xritjak'e ch'án nkaxenhen nínko ntá kóchjina tí sín nchát'á t'etōan la ko tí sín tjako tí ley la ko tí sín táda t'etōan nínko 28 kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

29 Ntá kjuátēhe ch'ín Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. 30 ¿A ntá nkexro k'uetuēnhen ch'ín Juan kixin tsikite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

31 Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuèté kuítekakuenhyani ch'án. 32 ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios. 33 Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsōxrjankahya nkexro kjuanjon kjuachaxin kixin xikaha t'a —ichro ch'án.

12

*Ch'ín Jesús mé kjuíncheyóexin ch'án éxi chojni
ch'ehya xra jina*

(Mt. 21.33-46; Lc. 20.9-19)

1 Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uenkaxin ch'án itsjé ntanòa t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjàt'ò noi kixin ts'it'ótjen ch'án tsokotohe ch'án.

A ntá kjuínchekjen ch'án tí nonte iso chojni ch'e xrā. Ntá sákjuí ch'án kjín. 2 Ntá tí kjuixraká tí yaon ts'óna to ntá k'uetuēnhen ch'án ijnko tí nkexro ch'ehe ch'án xrā kixin sátsjikjanchehe ch'án tí sín ch'e xrā jnkosiné tí to tsakja ch'án. 3 Ntá tí sín ch'e xrā mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. 4 A ntá tí ìnché tí nonte mé xíchr'án ch'án tí í jnko nkexro ch'ehe ch'án xrā. Ntá kjuíji ch'án ntiha ntá chjéhe sín ch'án xrō kjuíncheníhi sín kja ch'án la ko k'uántaxinhin sín ch'án. 5 Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xrā sákjuitsjehe sín, kjánchó iso sín k'uékon sín la í so sín la k'óyán sín.

6 Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. 7 A ntá tí sín ch'e xrā a tjo sín kíchó sín kixin: “Tí ch'ín í mé ts'áyéhe kaín nkehe síin ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín. 8 Ntá xikaha itsé sín ch'án k'óyán sín ch'án ntá kuakitsjexín sín ntōe ch'án tí nontee ch'án.

⁹ **A** ntá kjuanchankí ch'ín Jesús ntáchro ch'án kixin:

—¿**A** ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

¹⁰ ¿**Á** kjuinchekuáxinhyará jahará tí xroon itén Dios? Ntáchro xikihí:
Tí xro náxrjónhya kuítóenta tí sín ch'éna tjat'ò,
mé jie k'óna tí xro tjetóan.

¹¹ Mé xikaha kjuíché Ìnchéni Dios,
na ntá tíha mé ijnko nkehe kjuachrakon k'uíkoni†
—ichro ch'ín Jesús.

¹² Ntá chrótsé sín tí ch'ín Jesús chrókjuak'echjina sín ch'án kixin kienxín sín kixin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuítóhe sín ch'án ntá sákjuí sín.

*¿**A** jína chrókjuenkehe sín gobierno?
(Mt. 22.15-22; Lc. 20.20-26)*

¹³ **A** ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie. ¹⁴ Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjákua ntje Dios. ¿**Á** jína chrókjuenkeheni tí gobierno tí chichaon tjanchia? ¿**Á** chrókjuenkeheni sín ní o náhí? —ichro sín.

* **12:9** Isaías 5.1-7 † **12:11** Salmo 118.22-23

15 Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákōarā ijnko tí chichaon tjanchia sín tsotsjáha —ichro ch'án.

16 Ntá xrákao sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátehe sín kixin:

—Tí ch'ín t'etoan mé tjenkáni ch'án —ichro sín.

17 Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

*Kjuanchankí sín kixin á chaxín tsoxechón chojni
(Mt. 22.23-33; Lc. 20.27-40)*

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en. † 20 Kjánchó k'uéjō yato sín jnkokōá kichó sín. Ntá tí ch'ín saō mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. 21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá

† 12:19 Deuteronomio 25.5

kjaxin tsíkjich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen inaá. ²² Ntá kayatoé sín k'uéchónta sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. ²³ Ntá tió tsoxechón kaín xín chojni la, ¿Ntá nkexro ts'óna xì tjan kíxin kayatoé sín tsikótehe tjan? —ichro sín.

²⁴ Ntá kjuátehe ch'ín Jesús ntáchro ch'án kíxin:

—Ntoáhya tjenkayáxinrá kíxin tiénxinhyará nkehe ntáchro tí xroon itén Dios la ko chonhyará tí kjuachaxién Dios. ²⁵ A ntá tió tsoxechón tí chojni tsík'en la tsooteehya sín la ko tsjanjonhya sín xjeen sín kíxin tsootehe sín kíxin tí sín tsík'en la éxí sín ángel ts'ejó sín nkaya nkajní. ²⁶ A ntá tí tsoxechón tí sín tsík'en, ¿á kjuínchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xíkíhi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”? ²⁷ Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kíxin xikaha ichrorá tjanchankirá —ichro ch'án.

Tí nkehe antsí imá tjetooan tsík'etoan Dios

(Mt. 22.34-40)

²⁸ Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kíxin imá jína kjuátehe ch'ín Jesús. Ntá kjuanchankí ch'án ntáchro ch'án kíxin:

—¿Nkehe tí antsí tjetooan tsík'etoan Dios? —ichro ch'án.

29 Ntá kjuátehe ch'ín Jesús ntáchro ch'án kixin:

—Tí nkehe antsí tjetōan tsík'etōan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. 30 Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjetōan tsík'etōan Dios. 31 A ntá tí nkehe yóxin tsík'etōan Dios la mé tóyóhe na mé ntáchro xikihí: “Chrótjuèhérá kichuárá éxí tjuèxínrá asánrá,”† la kohya í jnko nkehe antsí má tjetōan tsík'etōan ch'án —ichro ch'ín Jesús.

32 A ntá kjuátehe tí ch'ín tjako nínko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡ 33 Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxinni Dios la ko chrótjuèheni kichó ni éxí tjuèxinni asénni.§ Tíha mé antsí má sínkí. A ntá kaín tí ko chrók'óyánni chrókjuanjōnni chróchjánxin chrítaón altar la kánhyó tjetōan tíha —ichro ch'án.

34 A ntá tió k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kínhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

*¿Xá nkexro It'é tí Cristo?
(Mt. 22.41-46; Lc. 20.41-44)*

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas 6.6

³⁵ Ntá ch'ín Jesús kjuák'ekjako ch'án tí n̄inko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David? ³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétoan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uejókínhin sín kóxrjínhin sín tí nkehe kjuako ch'án.

*Ch'ín Jesús chrónka nkexrí ch'e tí sín tjako tí ley
(Mt. 23.1-36; Lc. 11.37-54; 20.45-47)*

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinakáya sín ka kjínjin la ko tjinkaon sín kixin kaín tí chojni tsoxeta sín ntia mé tsjikosáyehe sín. ³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen n̄inko. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín. ⁴⁰ La ko takitsje sín ntōe chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

* **12:36** Salmo 110.1

*Tí ofrenda kjuanjon ijnko tjan k'án
(Lc. 21.1-4)*

⁴¹ **A** ntá jnkonaá mé ch'ín Jesús tjetjaxin ch'án nkaxenhen ninko chók'èxin tjan tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntiha mé kjui ijnko tjan k'án nòà tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòà tjan antsí tjete k'uikon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòà tjan la kjuanjon tjan kaín tí chichaon k'uéchónta tjan chrók'uíte nkehe chrókjóné tjan —ichro ch'án.

13

*Ch'ín Jesús chrónka kixin tsoxíka ninko
(Mt. 24.1-2; Lc. 21.5-6)*

¹ **A** ntá tió k'uaxrjexín ch'ín Jesús tí ninko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxika —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ **A** ntá sákjuí sín chrítaón tí jn̄a Olivo chók'èxin tjen tí n̄inko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoexínni nkesá tsoxiteyá kaín tíha —ichro sín.

⁵ Ntá ch'ín Jesús kjuátēhe ch'án ntáchro ch'án kixin:

—Tóxakonhanrá t̄it̄oéhýará kixin ninkexró chrókjuít'ayahýará. ⁶ Nchónhya chojni tsi tsontáchro sín kixin jehe sín mé Cristo. Ntá x̄ikaha sich'iyēhe sín nchónhya chojni.

⁷ **A** ntá tió tsinhínrá kixin tjanjonko kichó sín la t'óyán kichó sín la chrakonhyará tóxakuanhyará ó jehí tsonhen tíha. Kjónté x̄ikaha nax̄a tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'et̄oan ntá tí nkaxenhen n̄inko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín. ¹⁰ Tí nax̄a ts'itjányanhya chjasintajni la mé t'ichjánxin tsinhin chojni kaín xín nación tí tan jína tsaáxin sín. ¹¹ Tió sátsjikoará sín tsjikaánrá sín tí tjejó tí sín t'et̄oan, la tóxakuanhyará

nkehe tsjateherá la ko nkehe tsjenkayáxinrá. Náhí. Chronkará tí nkehe kjuanjon Dios tsontáchorá tí hora a, kixin jahyará tsonixjará. Náhí. Nchakuen Dios mé tsonixja. ¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakohen sín tí it'é la ko ìné la tsjikaán sín kixin its'en. ¹³ Kaínxín chojni chjasintajni tsonínkakohanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintácho profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochriin sín jna tsjík'ejómá sín. ¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxa chrókjuikakja sín iké sín. ¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankíxixín Dios kjuích'éna ch'án chjasintajni la ko kjá xikahya tsonhen chr'éxin ínaá. ²⁰ A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehé ch'án tí sín tsíkjeýá ch'án ntá k'uetōan

* **13:14** Daniel 9.27; 11.31; 12.11

ch'án kixin tjoka ts'atsínka tí kjuachrakon a.

²¹ 'A ntá jnkojín nkexro tsontáchro kixin: “Tsjehe, ntihi itjen tí Cristo”, o tsontáchro sín kixin: “Tsjehe, ntiha tjen ch'án”, la títekákuènyhará sín. ²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjejá Dios. ²³ 'A ntá jahará chroxákonhanrá kaín tíha. Tjéjtjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)

²⁴ 'Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ 'A ntá tí konotsé la ts'anótjenxin nkajní la ko tí kjuachaxin siín nkaya nkajní la kjaxin tsinkí. ²⁶ Ntá ts'ikon sín tí Xjeen Dios K'óna Chojni itsi chríkjan tjuj tsikao tí kjuachaxin jié. ²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

²⁸ 'Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹ mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuíchjina tí tsjeje chjasintajni. ³⁰ Chaxín ntáxrjan kixin kaín tíha tsonhen tí naxa t'enhya tí chojni siín chjasintajni. ³¹ 'A ntá tí nkajní la ko tí chjasintajni mé ts'itjáyan. 'A ntá tí nkehe ntáxrjan la ts'itjáyanhya, tsoxiteyá tíha.

³² 'A ntá tí yaon la tí hora tsoxiteyá tíha la ninxero noehya. Kjaxin noehya tí sín ángel tjejó

nkaya nkajní la ko kjaxin tí Xjeen Dios K'óna Chojni la noehya. Ó jehó It'éni mé nohe.

³³ Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko chojni sátsji kjín, a ntá tí naxa sátjixínhya ch'án ntoe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntoe ch'án, la jnkojnko sín ts'áyéhe sín jnkojnko xra kuènte sín. La ko ts'etuēnhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí ìché tí nchia a, á ijnko tsontanonte o á ijnko k'áxrótjen o á ijnko tjetēe tsje cochíká o á ijnko ts'inkaséyan. ³⁶ Ntá xrínahya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejótsehe sín —ichro ch'án.

14

*Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)*

¹ Naxa t'itjayan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánki niotja.

Ntá tí sín nchāt'á t'etoan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án. ² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

Ijnko tjan kuik̄itexín aceite náxrjón xraxé ikja ch'ín Jesús

(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchónta chinlepra. A ntá tí tjene ch'ín Jesús ntá xrínahya ikui injko tjan kuik̄ao tjan injko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuik̄ite tjan kja ch'ín Jesús tí aceite a. ⁴ A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé? ⁵ Íchá jína chrókóxi_{xin} iní ciento chichaon denario tí aceite a ntá tí chichaon a mé chróku_{it}onhen tí chojni nòa —mé xikaha ichro sín k'uántaxín_{hin} sín tjan.

⁶ Ntá ntáchro ch'ín Jesús kixin:

—Nté t̄toherá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan. ⁷ A ntá tí chojni nòa la ó xráxín ts'ejókoará sín la jína tsjínk̄itsará sín jnkojín yaon. Ntá janhan la jnkochrínínhya ts'ejóni. ⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána. ⁹ Chaxín ntáxrjan kixin ti tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuinchekji ch'án tí ch'ín Jesús

(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchaj'á t'etóan kixin tsochrónka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxixín kia sine sín niotja tsíkjikohya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyaxíxinni kixin sineni kuènte tí kia pascua? —ichro sín.

¹³ Ntá k'uetuēnhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí ìnché nchia, tsontáchrorá kixin: “K'uetóan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xíkaha mé tsixrorá. ¹⁵ Ntá tsjakohará ch'án ijnko cuarto jíé, yóxin piso mé chóna kaín nkehe t'ichjánxin. Mé ntaha mé sincheyaxíxinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xíkaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

17 A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. 18 Ntá k'uéjó sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

19 Ntá jehe sín mé kjuankixin k'uává sín. Ntá kjuankixin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

20 Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. 21 Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nàa tí ch'ín sinchekji ch'án. Íchá jína tí ch'ín a la chrókokjéhya ch'án —mé xikaha ichro ch'án.

22 A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

23 Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. 24 Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni. 25 Chaxín ntáxrjan kixin ts'íhya janhan tí ìnté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ía ìnté to uva nixin —mé xikaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehé ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuente Dios ntá sákjuí sín tí jnā Olivo. ²⁷ Ntá ch'ín Jesús ntáchro ch'án kixin:

—Ijie tie kaín rá tsochraKonrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kixin:

—Kjónté kaín sín tsítóha sín ntá janhan la náhí —ichro ch'án.

³⁰ Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátēhe ch'ín Pedro ntáchro ch'án kixin:

—Kjónté koína its'én la sintamáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjēexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uetuēnhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

* 14:27 Zacarías 13.7

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankíxin imá k'uává asén ch'án kóxakonhen ch'án. ³⁴ Ntá ntáche ch'án sín kíxin:

—Imá t'ává asenná éxí chrók'uén xíkaha. Ijie la ntihyó titohará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankíxin chrónóehē ch'án Dios kíxin chrókjuanjon ch'án kjuachaxin kíxin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kíxin:

—It'éni jaha. Jaha mé chonta kaín xín kjuachaxin na ntá chrónóahani tsjakjínhíni kaín tí jínahya tsonhenni tsjasóteni jie. Jehya kíxin chrókónhen éxí tjinkaonni jeheni. Náhí. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kíxin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejotsjehérá la ko chrónóehérá Dios kíxin títoehya ch'án tí Jínahya chrókjuichroerá. Tí asánrá ntáchro kíxin chrókjuinchesiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án inaá chrónóehē ch'án Dios. Ntá ó jehe xíkahó xínixja ch'án. ⁴⁰ Ntá ikjan ch'án la ó tjejójua sín inaá kíxin kuihí sín kotáchrin. Ntá í noehya sín nkexrí chrókjuatehe sín. ⁴¹ Ntá nixin sáxíkji ch'án ntá kjan ch'án ntá ntáchro ch'án kíxin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kíxin tí Xjeen Dios K'óna Chojni ts'áyéhe tí sín chóna jie sinchekjasóte sín

ch'án. ⁴² Ntá t'àyará sátsjini kixin ó kjui tí nkexro sinchekjina.

*Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)*

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín ch'ica espada la ko inta. Na mé kjuachaxién tí sín nchát'á t'etōan la ko tí sín maestro tjako tí ley la ko tí sín táda t'etōan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itserá ch'án sátsjikoará ch'án —ichro ch'án.

⁴⁵ Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶ A ntá tí sin kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án ch'ica espada kóchrínjin ch'án tatsjon tí ch'ín ch'ehe tí nchát'á t'etōan xra. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuèté kixin éxí chrótserá xíchee mé xikaha k'uinkakoará ch'ica espada la ko inta kixin tsotseráni? ⁴⁹ Kaín yaon kjuak'é nkaxenhen nínko kjuákoará, ¿ntá nkekuèté tsehyaráni? Kjánchó t'ichjánxín xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsítsé sín ntá kjónté tjóhín ch'án sákjuí ch'án.

Ch'ín Jesús kóhjna ch'án tí tjejó tí sín t'etoan
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntøe tí nch'at'á imá t'etoan. Ntaha mé tsíkójnkotsé kaín tí sín nch'at'á t'etoan la ko tí sín táda t'etoan nínko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nch'at'á imá t'etoan a. Ntaha síche xrohi. A ntá ntiha tjejójtjaxin tí sín policia tjejóhjíxrohe sín, ntá kjaxin ch'án ntahó kuítóhe ch'án tjechjíxrohe ch'án.

⁵⁵ Ntá tí sín t'etuñhen tí sín nch'at'á la ko kaín tí sín t'etoan kjueyá sín chojni kixin tsochrónka sín nkehe tí jie chóna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinkítsa tsochrónka. ⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí nínko tsíkjich'énaxín chojni tja ntá iní yaon koá la ó tsjak'e ch'án í jnko nínko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

† 14:58 Juan 2.19

60 Ntá tí ch'ín t'etuenhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kíxin:

—¿Á ninkehó tjateehya jaha? ¿Á chaxín tí jie t'eka sín tí jaha? —ichro ch'án.

61 Ntá ch'ín Jesús tání ch'án la ninkehó tjateehya ch'án. Ntá xíkjanchankí tí nchat'á t'etoan ntáchro ch'án kíxin:

—¿Á jaha tí Cristo Xjeen Dios imá tjóá? —ichro ch'án.

62 Ntá ntáchro ch'ín Jesús kíxin:

—Chaxín janhan tíha. Ntá chr'éxin ts'ikonrá kíxin tí Xjeen Dios K'óna Chojni mé tsjak'etjaxin ch'án tí tja chjina kjuachaxin kuènte Dios la ko itjui mé ts'inkajinxin ch'án nkaya nkajní —ichro ch'án.

63 A ntá tí nchat'á t'etoan kótséchje ch'án tí iké ch'án kjuakoxin ch'án kíxin imá nínkaon ch'án ntáchro ch'án kíxin:

—T'ichjanxinhya í so chojni tsochrónka nkehe.

64 Jahará ó kuínhínrá kíxin k'uántaxínhi ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kíxin chrók'uen ch'án.

65 Ntá ikjé sín la kjuankíxin sín kuikite sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kíxin:

—Tónoha kíxin nkexro kjuatia —ichro sín.

A ntá tí sín policía kuènte ninko chjéhe sín nkayakon ch'án.

Ch'ín Pedro kjuínchemá ch'án kíxin chónhya ch'án tí ch'ín Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntásin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etoan. ⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixin chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexin ch'án ntiha sákjui ch'án ntója. Ntá xrínahya itsje ijnko kochíntoa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín sintaxín ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjontaxín ntáche sín tí ch'ín Pedro kixin:

—Chaxín kjaxian jaha tsíkjíxian estado Galilea kixin tjatsqanxínni kixin nixja jaha éxí nixja tí jehe sín —ichro sín.

⁷¹ Ntá ch'ín Pedro kjuankíxin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntoa yáya mé ó tsjixin sinchemána níya kixin chonhyana.”[‡] Ntá xraxinkaon ch'án tíha la ntá kjuankíxin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

[‡] 14:72 Marcos 14.30

15

*Ch'ín Jesús nkayakon tí ch'ín Pilato
(Mt. 27.1-2, 11-14; Lc. 23.1-5; Jn. 18.28-38)*

¹ A ntá ó k'uínkaséyan ntá tí sín nch'at'á t'etōan kójnkotséko sín tí sín táda la ko tí sín tjako tí ley la ko kaín tí sín t'etōan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato. ² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátēhe ch'ín Jesús ntáchro ch'án kixin:

—Kjāxian jaha ntáchrua —ichro ch'án.

³ A ntá tí sín nch'at'á t'etōan mé k'ueka sín ch'án nchónhya jīē. ⁴ Ntá ch'ín Pilato xíkjančankí ch'án inaá ntáchro ch'án kixin:

—¿Jaha, nkekuènté tjetēehya ninkehó? Tsjehé kixin nchónhya jīē t'eka sín tí jaha —ichro ch'án.

⁵ A ntá ch'ín Jesús la ninkehó kjuátēehya ch'án. Ntá ch'ín Pilato la í noehya ch'án nkehe tsjenkayáxin ch'án.

*K'uáyéhe ch'ín Jesús kixin sinčekjasóte sín ch'án
ntá its'en ch'án
(Mt. 27.15-31; Lc. 23.13-25; Jn. 18.38—19.16)*

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanchia tí sín tsíkójnkotsé tí kia a. ⁷ A ntá ntiha tjechjina ijnko ch'ín mé it'in Barrabás, la ko í so sín kuítékakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankixin sín kjuanchehe sín tí ch'ín Pilato

kíxin chrókjuich'e ch'án éxí kaín nánó xíkaha. ⁹ Ntá kjuátehe ch'ín Pilato kíxin:

—¿Á t̄jinkáonrá ts̄itoh̄a sátsji tí ch'ín Rey t'et̄uēnhen tí s̄ín judío? —ichro ch'án.

¹⁰ Mé xíkaha ichro ch'án kíxin jehe ch'án la ó nohe ch'án kíxin kjuachj̄inox̄ínhin xriko tí s̄ín nchat'á t'et̄oan, a ntá tsé s̄ín tí ch'ín Jesús kjuikénhen s̄ín ch'án. ¹¹ A ntá tí s̄ín nchat'á t'et̄oan a mé kjuínchekóninkaon s̄ín kaín tí chojni s̄ín, ntáche s̄ín kíxin íchá j̄ína chrókjuanchia s̄ín kíxin chrók'uatj̄ánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchro ch'án kíxin:

—A ntá tí ch'ín t̄ik̄itex̄ínrá kíxin ch'ín Rey t'et̄uēnhen tí s̄ín judío la ¿nkehe t̄jinkáonrá s̄it'ah̄a ch'án? —ichro ch'án.

¹³ Ntá jehe s̄ín kjuátehe s̄ín k'óyako s̄ín kjuanchia s̄ín kíxin:

—¡T̄jakénk̄ania ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe s̄ín kíxin:

—¿Xá nkehe tí j̄inahya kjuích'e ch'án? —ichro ch'án.

Kjánchó ānt̄sí má itsen k'óyako s̄ín kjuanchia s̄ín kíxin:

—¡T̄jakénk̄ania ch'án ntacruz! —ichro s̄ín.

¹⁵ Ntá ch'ín Pilato mé t̄jinkaon ch'án sinchex-iteyá ch'án tí nkehe kjuanchia tí s̄ín k'uíxité ntá kuítóhe ch'án kíxin sátsji tí ch'ín Barrabás. Ntá k'uet̄oan ch'án kíxin tsjate s̄ín tí ch'ín Jesús. Ntá kjuix̄ín ntá kjuanj̄on ch'án kjuachaxin kíxin tí s̄ín soldado sátsjiko s̄ín ch'án ts̄jak'enk̄ani s̄ín ch'án ntacruz.

¹⁶ Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'i. ¹⁸ Ntá kjuankíxin k'uíxité sín ntáchro sín kíxin:

—Jnkochríxín tsjak'e tsétuēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuíkíte sín ch'án. K'uéjóxín toch'in sín nkayakon ch'án kjuích'eyáxixín sín éxí imá chrókjuikosáyehe sín ch'án. ²⁰ Ntá tió kjuixin xikaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kíxin ntá tsjak'enkani sín ch'án ntacruz.

*Ntá kjuak'enkani sín ch'ín Jesús ntacruz
(Mt. 27.32-44; Lc. 23.26-43; Jn. 19.17-27)*

²¹ A ntá ijnko ch'ín tsíkjixín chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjixín ch'án nontee ch'án, ntá k'uátsínka ch'án ntiha. Ntá tí sín soldado a mé k'uētuenhen sín ch'án kíxin tsochréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuíko sín tí ch'ín Jesús ijnko tjo it'in Gólgota, na mé nkívee sín t'axrjexín kíxin Tjo Calavera. ²³ Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án. ²⁴ Ntá tí sín soldado kjuak'enkani sín ch'án tí ntacruz a. Kjuixin ntá

kjuích'exín sín suerte tí ké ch'án kixin tsonohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a. ²⁶ Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáchro kixin: “Jehe ch'án mé Rey kuènte tí sín judío”. ²⁷ Na ko kjaxin k'uéjáyáni sín ntacruz yaá tí síchee la ijnko la nánko chjina la íjnko la nó kjon tí tjen ch'ín Jesús. ²⁸ Na mé xikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jje mé k'uíkon sín ch'án”*.

²⁹ Ntá tí sín k'uatsínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kixin:

—Kjá na ntáchrúa kixin chrók'oxíka tí nínko, a ntá iní yaon koá la ó chrókjuixin chrókjuich'éna inaá,† ichrúa. ³⁰ Nchekaá asán jahvá tjasinkajinxián tí ntacruz méhe —ichro sín.

³¹ Ntá tí sín nchat'á t'etoan la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. ³² A ntá chaxín jehe ch'án tí Cristo tí Rey kuènte tí nación Israel ntá chrók'uikonni kixin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

* **15:28** Isaías 58.12 † **15:29** Marcos 14.58; Juan 2.19

*Ntá k'uén ch'ín Jesús**(Mt. 27.45-56; Lc. 23.44-49; Jn. 19.28-30)*

³³ A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjín
³⁴ ntá tí hora a mé itsen k'uèya ch'ín Jesús ntáchro ch'án kíxin:

—Eloi, Eloi, ¿lama sabactani? —tí nkívee sín mé t'axrjexín kíxin: It'éni, It'éni, ¿nkekuènté kuitohéni?,‡ mé xíkaha ichro ch'án.

³⁵ Ntá iso sín siín ntiha kuínhin sín, ntá ntáchro sín kíxin:

—Tinhínrá kíxin t'íyehē ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjinjin ntá kjuínchekhina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kíxin:

—Tsítóheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkáuènxín nkaxenhen nínko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kíxin xíkaha ó kjuixin k'uén ch'án ntá ntáchro ch'án kíxin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uéjó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen

‡ 15:34 Salmo 22.1

tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin i mé kuinkáchréhe sín tí ch'ín Jesús ntá kjuíkao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ók'éhe sín, ⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etoan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntoe ch'ín Pilato kjuíkjanhia ch'án tí cuerpo kuènte ch'ín Jesús. ⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xíkaha kónhen. ⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. ⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjō. Ntá ijnko xro jíé mé k'uíkjèxin ch'án tí ntója tí tòye. ⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ **A** ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuente ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tòye tsíxravá ch'án, na mé ó kjuiton yaon. ³ **A** ntá jehe sín mé tinkákjo kichó sín kixin:

—¿Xá nkexro tí chrókuakjlinhinni tí xro tjejkèxin tí tòye? —ichro sín.

⁴ **A** ntá xrinahya k'uíkon sín kixin ó tsíkjixin tsíkjin tí xro jíe tjejkèxin tí tòye kixin í tjenhya éxí k'uékjak'e senó. ⁵ Ntá kjuíji sín ikon tí tòye ntá k'uíkon sín kixin tjetjaxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjixin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. ⁷ Ntá sájtirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxránkə sín chrakon sín. Ntá naxa chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena
(Jn. 20.11-18)*

⁹ Tió tsíkjixin tsíxechón ch'ín Jesús nchítjen tí yaon xrankíxín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

Iyó sín k'uék'ajiko ch'ín Jesús titàya k'uíkuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntia sátsji sín ijnko nonte. ¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

Ch'ín Jesús k'uētuenhen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin:

—Sátjirá kuenté chjasintajni tjákohérá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasín sín kjuaxroan kixin kjuachaxín nina tsakitsjexín sín tí nchakuen tí jínahya chóna chojni la ko tsonixja sín ókjé nkìva. ¹⁸ Kjónté konche

* **16:13** Lucas 24.13-35

chrótsé sín la kohya nkehe tsonhen sín la ko kjónté chrók'ui sín ijnko ntà chón̄ta veneno la kohya nkehe tsonhen sín. Kjaxin ts'ejotja tja sín chojni níhi la tsit̄ohe sín jína.

*Ch'ín Jesús chr̄in ch'án nkaya nkajní
(Lc. 24.50-53)*

¹⁹ Ntá ó kjuixin nixjeh̄e Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios. ²⁰ A ntá jehe sín sákjuí sín nkuíxín sákjuík̄jako sín tí tan jína tsaáxin chojni. A ntá jehe Ìnchéni mé kjuínk̄itsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoexín tí sín tjejótin̄hin kixin chaxín nkehe kuènte Dios kjuako sín. Amén.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

b9b09122-b3f6-59f0-9594-749907b32b5b